

प्रादेशिक समाचार
आकाशवाणी जैपुर-अजमेर

दिनांक १३.१२.२०१७

समय: १८.५०

००००

- राज्य मांय भारतीय जनता पार्टी रा राज रा चार साल पूरा ढ्वैवण रै मौके आज प्रदेशभर मांय कैई कार्यक्रम ढ्खा- मुख्यमंत्री वसुंधरा राजे सरकारी नौकरियां मांय भर्ती री उम्र ३५ ऊं बधा र ४० साल करण रो ऐलान कीनी।
- प्रधानमंत्री नरेन्द्र मोदी कह्यो- बैंकां मांय जमा जणता री रकम महफूज है।
- संसद माथै आतंकी हमला री बरसी रै मौके आज शहीदां नै सिरधाजंलि दीरी ज्यो।
- ओलम्पिक मांय तमगो जीतण वाळा मुक्केबाज विजेन्द्र सिंह आज जैपुर मांय खेल मंत्री गजेन्द्र सिंह खींवर ऊं मुलाकात कीनी- मुक्केबाजी अर कुश्ती री अकादमी खोलण रा बारा मांय बातचीत ढ्ही।

०००

प्रदेश मांय भारतीय जनता पार्टी रा राज रा चार साल आज पूरा ढ्हे गया। ई मौके राज्य स्तर रो जळसो झुंझुनूं मांय राख्यो ज्यो। जळसा मांय मुख्यमंत्री वसुंधरा राजे राज्य सरकार री नौकरियां मांय भर्ती री उम्र ३५ ऊं बधा र ४० साल करण रो ऐलाण कीनी। मुख्यमंत्री हादसां मांय जख्मी ढ्वेवण वाळां रो ४८ घंटां ताई मुफ्त ईलाज अर दिल री बीमारियां वाळां सारू मुफ्त एंजियोग्राफी रो सुबीतो मुहैया करावण रो ऐलाण ई कीनी। श्रीमती राजे कह्यो कै आवता एक साल मांय १ लाख ४० हजार ओहदां माथै भर्तियां करी जावेला।

....

जळसा मांय मुख्यमंत्री, शेखावाटी हलका सारू विकास रा दो हजार २३७ करोड़ रुपया रा कामां री सरुआत कीनी अर जणता नै सुंया। ई मौके वै कह्यो कै राज्य सरकार लारला चार साल मांय ८० हजार करोड़ रुपया लगा र ५० हजार किलोमीटर लंबी सड़कां बणवाई है। मुख्यमंत्री करसां रा दुर्घटना बीमा री रकम बधा र १० लाख रुपया करण रो ऐलाण ई कीनी ।

....

राज्य सरकार रा राज रा चार साल पूरा ढ्वैवण रै मौके राजधानी जयपुर समेत न्यारा-न्यारा जिलां मांय ई कार्यक्रम राख्या ज्यो।

अजमेर मांय महिला अर बाल विकास मंत्री अनीता भदेल अन्नपूर्णा योजना रा दूजा दौर रा तैत पांच अन्नपूर्णा रसोई गाड़ियां नै हरी झंडी बता र विहर कीनी। झालावाड़ मांय सांसद दुष्यंत सिंह विकास प्रदर्शनी रो उद्घाटन कीनी। सवाईमाधोपुर मांय जिला स्तर रो जळसो काल इंदिरा मैदान मांय ढ्हेला। इण ई सिलसिला मांय आज शहर मांय स्कूटर-मोटरसाइकिलां री रैली निकाळी ज्यो। नागौर मांय जिला प्रशासन कानी ऊं विकास प्रदर्शनी लगायी ज्यो। जालौर मांय एक दिन रा रोजगार मेळा री सरुआत प्रभारी सचिव कुंजीलाल मीना कीनी। भरतपुर मांय भारतीय जनता युवा मोर्चा कानी ऊं मोटरसाइकिल रैली निकाळी ज्यो। हनुमानगढ मांय गरीब कल्याण मुद्दा माथै कार्यक्रम राख्यो ज्यो। जैपुर मांय भारतीय जनता पार्टी रा प्रदेश अध्यक्ष अशोक परनामी आज खबरनवीसां सागै बातचीत करता थकां राज्य सरकार रा राज नै घणो चौखो बतायो। कांग्रेस कानी ऊं लगाया ज्यो सरकार री नाकामी रा आरोप नै निराधार बताता थकां वै कह्यो कै कांग्रेस नै आरोप लगाती बगत आंकड़ा पेश करणा चाहियै।

वै कह्यो कै ई सरकार रो चार साल रो कामकाज लारली कांग्रेस सरकार रै मुकाबले हर मामलां मांय चौखो रह्यो है। दूजी कानी विधानसभा मांय विपक्ष रा नेता रामेश्वर डूडी आज प्रदेश री भाजपा सरकार रा चार साल रा राज नै चौखो नी बतायो अर जवाब सारू ५२ सवाल सरकार सामी रख्या। श्री डूडी कह्यो कै सरकार नौजवानां, करसां अर कर्मचारियां सागै दगो कीनी है अर सुराज संकल्प यात्रा री बगत जनता ऊं कर्या ज्यो ६११ वायदा मांय ऊं सरकार ४० फीसदी ई पूरा नी कर सकी है।

०००००

प्रधानमंत्री नरेन्द्र मोदी वित्तीय समाधान और जमा बीमा विधेयक २०१७ रा बारा मांय जताई जा रही शंका बीचै आज जणता नै भरोसो दिरायो कै वां रो धन हिफाजत सागै है। वै आज नुवी दिल्ली मांय उद्योग परिसंघ फिक्की री आम सभा मांय कह्यो कै ई बिल रा बारा मांय अफवाह फैलाई जा रही है। वै बतायो कै ई बिल मांय प्रावधान है कै गर कोई वित्तीय कंपनी डूबै है तो वां हालात मांय वा लोगां री रकम काम लै सकै है। ई बिल मांय कम ती कम बीमित रकम रो ई प्रावधान है। बिल रा प्रावधान रै मुजब जमा बीमा अर ऋण गारंटी निगम री ठौड़ एक समाधान निगम बणायो जावैला।

०००

देश, साल २००१ मांय आज ही रा दिन संसद माथै व्ह्या आतंकी हमला मांय संसद रो बचाव करता थकां शहीद व्हैवण वाळा नै आज सिरधांजलि दीनी। उपराष्ट्रपति अर राज्यसभा रा सभापति एम. वेंकैया नायडू, प्रधानमंत्री नरेन्द्र मोदी, लोकसभा अध्यक्ष सुमित्रा महाजन, पैली वाळा प्रधानमंत्री डह. मनमोहन सिंह, कैई केन्द्रीय मंत्री, सांसद अर न्यारी-न्यारी पार्टियां रा नेता शहीदां नै सिरधांजलि दीनी।

००००

सुप्रीम कोर्ट आधार संख्या नै न्यारी-न्यारी सरकारी योजनावां ऊं जोड़बा रा केन्द्र सरकार रा फैसला री खिलाफत करण वाळी अर्जियां माथै काल सुणवाई करैला। अर्जी दैवण वाळा वकील मुख्य न्यायाधीश दीपक मिश्रा री सदारत वाळी तीन जजां री पीठ सामी मामलां रो खास जिक्र कीनो। न्यायमूर्ति मिश्रा कह्यो कै ई मामला री सुणवाई काल दौपेरा पाछे दो बज्यां करी जावैला।

००००

ओलम्पिक खेलां मांय तमगो जीतण वाळा भारत रा मुक्केबाज विजेन्द्र सिंह कह्यो है कै २३ दिसम्बर नै जैपुर रा सवाई मानसिंह स्टेडियम मांय व्हैवण वाळा मुकाबला सारू वै तैयार है। वै कह्यो कै वां नै ओ मुकाबलो ई जीतण री पूरी आस है।

....

इण ऊं पैली विजेन्द्र सिंह खेल मंत्री गजेन्द्र सिंह खीवसर ऊं मिल्या। ई मौके खेल मंत्री कह्यो कै राज्य मांय मुक्केबाजी अर कुश्ती अकादमी खोलण माथै चर्चा व्ही।

००००

अबै जिलां ऊं मिल्या दूजा समाचार:-

- हनुमानगढ जिला मांय केन्द्रीय सहकारी बैंक कानी ऊं २० दिसम्बर ताईं रूपे किसान डेबिट कार्ड दिया जावैला।
- भरतपुर रा महारानी श्री जया कॉलेज मांय पढ़बा वाळी लड़कियां सारू कौशल विकास कार्यक्रम रा तैत इग्नू रा कोर्स सुरू कर्या ज्या रह्या है।
- जैपुर मांय काल अदालत अर जेल बीचै वीडियो कांफ्रेंसिंग मुद्दा माथै दो दिन रो सिखावण कार्यक्रम सुरू व्हेला।
- बारां जिला मांय दिसंबर रा पैला सप्ताह ताईं ६३ हजार क्विंटल उड़द अर २३ हजार क्विंटल सोयाबीन री सरकारी मोल माथै खरीद करी ज्यी है।
- पाली जिला रा बड़ी सादड़ी मांय मीणा का झूपा गांव मांय गांव वाळां गैर कानूनी कब्जा रै खिलाफ प्रदर्शन कीनो।
- नागौर जिला रा डाकखानां मांय निष्क्रिय पड़्या तीन लाख ऊं बत्ता खाता ओज्यू सुरू कर्या जावैला।
- बांसवाड़ा रा जिला अर सत्र न्यायाधीश आज किशोर गृह रो दौरा कीनो।

००००

जैपुर मांय आज खबरनवीस मकान, पेंशन अर बिना नकदी बीमा समेत न्यारी-न्यारी मांगा न लैर काळो दिवस मनायो। राज्य सरकार रो चार साल रो राज पूरो व्हैवण रै मौके आज जैपुर मांय प्रेस क्लब सामी धरना माथै बेठ्योड़ा खबरनवीसां रा संगठन सरकार माथै वादा खिलाफी रो आरोप मांड्यो। इण ऊं पैली पिकसिटी प्रेस क्लब सामी खबरनवीस प्रदर्शन कीनो।

००००